

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 211 del 30/01/2026

L nef hub l é stat descori sot na bela gran nevera. À tout pèrt l president de la Provinzia, de Trentino Trasporti e i raprejentanc del teritorie

L é vegnù inaudà la Stazion Intermodèla de Ciavaleis, opera strategica per Milan Cortina 2026

[Ladino] Na neva autostazion per l trasport publich, integrèda con n gran piazal per i auti sot tera de interscambie modal con 135 pos per i auti e da n garage nef per 15 corieres de Trentino Trasporti, fornida de stazions eletriches per ciarièr i mesi eletrics neves a emiscions zero compré en previjion del event olimpich e paralimpich. L é la Stazion Intermodèla de Ciavaleis, una de la operes strategiches leèdes ai investimenc per i Jeghes Olimpics e Paralimpics da d'invern Milan Cortina 2026, inaudèda en mercol ai 28 de jené sot na gran nevera a la prezenza del president de la Provinzia autonoma de Trent, de la autoritèdes e de la firmes che lurà do la realizazion.

Al event à tout pèrt, anter i etres, l president de Trentino Trasporti Diego Salvatore, l ombolt de Ciavaleis, apede a parlamentères e conseieres provinzièi, aministradores e raprejentanc del teritorie, de la forzes del orden e tecnicos provinzièi.

En ocajion de l'inaudazion, l president de la Provinzia l à metù al luster coche la mobilità l è na pèrt strategica di investimenc leé a la Olimpiades e Paralimpiades, olache l Trentin l moscia la valuta de se enjgnèr miec che la va per l gran event. La Stazion Intermodèla de Ciavaleis, l à sottrissà, dessema coi intervenc de Penia a Canazei e Sèn Jan che i rua a n investment total de 17 milions, l raprejenta n gran bel ejempie positif de chel che resta tel temp sul teritorie. La realizazion de n sistem de trasport publich modern, sostenibol e de fazon, l à ence dit, l é funzionèl per miorèr la calità de la vita per la comunanza de la valèdes de la Veisc e i coleamenc co la Val del Adesc.

L president de Trentino Trasporti Diego Salvatore col reingrazièr duc chi che à fat pèrt del projet l à rejonà de n lurier strategich funzionèl per smaorèr con mesi ecologics l trasport publich per l servije de la valèdes de la Veisc, enzeve l ombolt de Ciavalei l à sottrissà l valor de l'infrastrutura per la connescion del teritorio e per n davegnir out a la sosteniboltà.

La neva Stazion Intermodèla la raprejenta coscita un di crouscdevia logistics de interscambie de la Val de Fiem. L intervent (import de 14.750.000 euro) l è vegnù gestì da Trentino Trasporti a una co la Provinzia autonoma de Trent e l Comun de Ciavaleis, su na spersa publica che i ge disc Prà dei Tini, comprèda da sozietà. Tel medemo temp, coi i ntervenc infrastruturèi, Provinzia e Trentino Trasporti i à investì a na vida emportanta ence sui mesi a rodes, l è vegnù comprà 30 corieres neves: 20 corieres a eletrich a zero emiscions e 10 corieres a metan "clan emiscions".

L projet tel detai

La Stazion Intermodèla de Ciavaleis la se svilupea su n loto de 6.939 metres cadrac, anter la Strèda Statala 48 de la Dolomites e strèda Paradisi, e la é caraterisèda da soluzions projetuèles che tegn cont de la sosteniboltà ambientèla.

La strutura la perveit l ofize per i biliec, sala da spetèr, impiant per lavèr i mesi e n depojit con n teac vert. L

impiant l'é coleà col telesciudament de Avisio Energìa, con n impiant da tulins da soreie da 25 kW e de n sistem per recuperèr l'ega de la pievia per lavèr i mesi. L teac vert l deida ence a smendrèr l impat per la vijion de la struttura tel contest urban e del paesaje.

Dut ensema l projet l perveit trei stazions infrastruturèles a servije del trasport public local: apede a la neva Stazion Intermodèla de Ciavaleis, l vegn pervedù a Sen Jan de meter su l nef zenter logistich de Fascia, con piazzal per la corieres e distributores per l metan, e ence amò aldò l garage, la berstot per la manutenzion e la infrastrutures per la cèria eletrica; ta Penìa, tinùltima, l'é stat programà de smaorèr l garage atuèl, con doi pèrts neves e set colonines per la cèria de la corieres eletriches.

Traduzion di Servijes Linguistics e Culturèi del Comun general de Fascia

(cdt)